



Broj: 04/5-05-1-2618-3/16
Sarajevo, 27.11. 2016.

PREDMET: Informacija o učešću delegacije PSBiH u PSNATO u radu 62. godišnjeg zasjedanja Parlamentarne skupštine NATO-a, Istanbul , Turska (17.-21. 11.2016.)

Delegacija Parlamentarne skupštine Bosne i Hercegovine (PSBiH) u Parlamentarnoj skupštini Sjevernoatlantskog saveza (PSNATO), u sastavu predsjedavajući Nikola Lovrinović, Dušanka Majkić i Asim Sarajlić, članovi Delegacije, učestvovali su u radu 62. godišnjeg zasjedanja PSNATO koje je održano od 18.-21.11. 2016. u Istanbulu.

Na trodnevnom zasjedanju PS NATO se razgovaralo o brojnim pitanjima kao što su: tokovi implemantacije odluka sa NATO samita iz Velsa i Varšave, o odnosima NATO sa Rusijom, transatlantskim odnosima, nastojanjima da arapski svijet izgradi novu sigurnosnu strukturu i strategiju, potrebi daljeg jačanja savezništva u borbi protiv ISIL-a, daljoj strategiji za održavanje međunarodne podrške Afganistanu, potrebama za dodatno ulaganje u odbrambeni sektor zemalja NATO te dostizanje izdvajanja budžetskih sredstava za nacionalnu obranu u visini od 2% bruto nacionalnog dohotka, borbi protiv terorizma i svih oblika radikalizma, migracijskoj krizi i sigurnosnim izazovima koje nosi sa sobom.

Tokom drugog dana 62.godišnjeg zasjedanja, na sjednici Komiteta za civilnu dimenziju sigurnosti PSNATO je obavljena rasprava o konačnom specijalnom izvještaju o temi: „Zapadni Balkan: Izazovi europskih i euroatlantskih integracija“. Prezentovan je Izvještaj članova ovog Komiteta, koji su 8. i 9. marta 2016. boravili u radnoj posjeti Bosni i Hercegovini i Srbiji. Predmetni izvještaj predstavlja viđenje aktuelnog stanja u zemljama Zapadnog Balkana, a o istom je obavljena i posebna rasprava tokom proljetnog zasjedanja PSNATO u Tirani.

Ulla Schmidh, specijalni izvjestilac Komiteta za civilnu dimenziju sigurnosti PSNATO je naglasila u svom uvodnom izlaganju da Izvještaj govori o stanju u zemljama Zapadnog Balkana te da njegova konačna forma, o kojoj se raspravlja u Istanbulu, treba biti podsticaj i motiv zakonodavnoj i izvršnoj vlasti zemalja zapadnog Balkan da se u cjelini i uz bolju saradnju okrenu boljoj budućnosti koja je u NATO i Evropskoj uniji.

Kada je u pitanju viđenje stanja u Bosni i Hercegovini, Ulla Schmidh je pozvala BH. političare da nastave s reformama i preuzetim obvezama. Pozitivne procese treba nastaviti jer Bosna i Hercegovina zaslužuje europsku budućnost. Pozvala je članice NATO da pomognu Bosni i Hercegovini u aktiviranju Akcijskog plan za članstvo-MAP.

Nikola Lovrinovic, predsjedavajući Delegacije PSBiH u PSNATO je u svom obraćanju pred članovima ovog Komiteta vrlo jasno pozvao njegove članove da podrže Bosnu i Hercegovinu u namjeri da se aktivira Akcijski plan za članstvo MAP, te je istakao pomake koji su urađeni na putu BiH ka EU.

Lovrinović je prisutne podsjetio da je tokom ministarske konferencije zemalja NATO u Talinu, 2010. godine, Bosni i Hercegovini uslovno dato da krene sa realiziranjem Akcionog plana ako se izvrši uknjiženje 69 vojnih lokacija. U proteklih šest godina se pokazalo da je to praktično nemoguća misija jer je cjelokupan proces otišao na politički teren.

Na ove činjenice su Lovrinović i Sarajlić ukazivali i tokom posjete Komiteta Bosni i Hercegovini, a i tokom posjete gospodina Mike Turnera, predsjedavajućeg PSNATO u novembru 2015. godine te predlagali da se uslovi, koji su tada postavljeni, redefinišu kako bi se aktivirao MAP.

Time se ne prejudicira odluka o ulasku Bosne i Hercegovine u NATO. Time nastavljamo sa procesom dostizanja standarda koji će omogućiti našim vojnicima da, kroz programe koje nudi NATO, krenu u jednu novu fazu reorganizacije i opremanja.

Lovrinović je vrlo jasno rekao da u našoj zemlji postoje različita viđenja oko ulaska u NATO. Odluka o članstvu u NATO očito ostaje neriješeno pitanje, ali ne i nemoguć cilj.

Dušanka Majkić, članica Delegacije, se osvrnula na neka aktuelna politička pitanja u Republici Srpskoj gdje je, između ostalog, govorila o referendumu koji je održan 25. rujna 2016. te o razlozima zbog kojih nije uknjižena vojna imovina.

Tokom plenarnog zasjedanja, koje je održano 21.11.2016. učesnicima su se, između ostalih, obratili predsjedatelj PSNATO Michael Turner, predsjednik Republike Turske Recep Tayyip Erdogan, te generalni sekretar NATO Jens Stoltenberg.

Predsjedavajući Turner je tom prilikom izrazio čvrstu odlučnost PSNATO u implementiranju odluka sa ranije održanih samita NATO u Velsu i Varšavi. Naglasio je da NATO ima obavezu odgovoriti na sadašnje izazove koji ugrožavaju sigurnost u cijelom svijetu. Ocijenio je da borba protiv terorizma i jedinstven odgovor nemaju alternative, te pozvao na jačanje transatlantske solidarnosti. On je pozvao članice NATO-a da podrže Tursku, njen narod i rukovodstvo na putu ka daljem stabiliziranju stanja, zaključujući da je Turska to zaslužila kao istaknuta i vrlo značajna članica Saveza.

Predsjednik Republike Turske Recep Tayyip Erdogan, izrazio je posebno zadovoljstvo što se 62. godišnje zasjedanje PSNATO-a održava u Republici Turskoj. Osvrnuo se na brojne izazove sa kojim se suočavaju ova zemlja, NATO članice i svijet u cjelini. S tim u vezi, pozvao je na saradnju članice NATO, kao i njene pridružene članice, te na dalje jačanje međusobne solidarnosti i povjerenja. Naglasio je da je potreban još jači odgovor članica NATO po pitanju borbe protiv terorizma, te pozvao članice NATO da istraju u borbi protiv svih oblika radikalizma. Erdogan je naglasio da je poštovanje Ustava Republike Turske, vladavina prava i vjernost demokratiji nedvosmisleno opredjeljenje ove države, te pozvao zemlje iz sastava NATO-a da pomognu Turskoj, posebno u rješavanju pitanja koja su vezana za izbjelice i probleme koje sa sobom nosi migrantska kriza.

Izražavajući zadovoljstvo što se zasjedanje PSNATO održava upravo u Istanbulu, generalni sekretar NATO Saveza Jens Stoltenberg naglasio je da je NATO dao snažnu potporu rukovodstvu i narodu Republike Turske u očuvanju demokratije i vladavine prava. Ocijenio je da međusobna

saradnja i solidarnost između NATO članica nemaju alternativu, te zaključio kako je NATO potpuno opredijeljen da na tom putu i istraje.

Inače, tokom ovog plenarnog zasjedanja usvojen je i jedan broj rezolucija, među kojima je od najvećeg značaja ona kojom se traži povećanje troškova budžeta za odbranu, te borbu protiv terorizma i ISIL-a.

Delegacija PSBiH je imala niz bilateralnih susreta sa delegacijama zemalja Zapadnog Balkana i jugoistočne Evrope, gdje posebno treba istaći visok nivo razumjevanja sa članovima delegacija Crne Gore, Hrvatske i Srbije.

Aktivnosti delegacije PSBiH u PSNATO pratio je i ambasador BiH u Republici Turskoj Damir Džanko.

PREDSJEDAVAJUĆI DELEGACIJE

Nikola Lovrinović

Prilog:

-Izlaganje Nikole Lovrinovića, predsjedavajućeg delegacije PSBiH u PSNATO